

FOKTIM AMBOHIMANANDRAY

Fanamafisana ny antoko ny fanetsehana ny fototra

Nanavao ny birao mpitantana azy ny alakamisy teo ny FOKTIM Ambohimandray, ao amin'ny Boriboritany faha-6 eto Antananarivo Renivohitra. Tafajoro nandritra izany ny birao vaovaon'ny FOKTIM, mbola lany ho filoha Ramatoa Rasoarilala Josephine, nisy fanavaozana kosa ireo mpikambana amin'ny birao. Nandritra izany koa no natao ny famelomamaso ny antoko TIM tao amin'ity fokontany Ambohimandray Ambohimandarina ity. Tonga maro ireo mpikatroka tamin'io fotoana io. Nanome voninahitra ny fotoana ny solontenan'ny DisTIM Boriboritany faha-6, ny filohan'ny Vehivavy TIM Analamanga. Nivoitra nandritra ireo lahateny nifandimbiasana fa fanamafisana ny antoko ny fanetsehana ny fototra toy izao natao izao. Nandritra izao fotoana izao koa no nananganana ny birao'ny Tanora sy ny Vehivavy TIM Ambohimandray. Namaranana ny fotoana ny fiaraha-miasakafo, nifampizarana ny nofon-kena mitam-pihavanana, izay nomanin'i Martial Tovonirina, Malagasy avy amin'ny GTT-RMDM Diaspora La Reunion, izay mandalo eto



Josephine Rasoarilala (mijoro mikabary), filohan'ny FOKTIM Ambohimandray Ambohimandarina.

an-tanindrazana amin'izao fotoana.

Isambilo

COMTIM Ambohitrimanjaka

Tsy diso anjara tamin'ny fiarahabana ny filoha Ravalomanana

Mitohy hatrany ny fifampiarahabana tratry ny Asaramaniry ny taona vaovao, fiarahabana ny filoha Marc Ravalomanana, filohan'ny RMDM (Rodobenen'ny Mpanohitra ho an'ny Demokrasia eto Madagasikara), sady filoha nasisionalin'ny antoko TIM, eny Faravohitra. Ny alakamsiy teo, ny COMTIM Ambohitrimanjaka distrikan'Ambohidratrimo indray, no nifampiarahaba tratry ny taona tamin'ny filoha Ravalomanana. Fifampidinihana teo amin'



Ny avy amin'ny COMTIM Ambohitrimanjaka teny Faravohitra.

ny ray aman-dreny sy ny zanaka ihany koa no natao

nandritra izany fotoana izany. Nivoitra tamin'ny fi-

haonana, fa miroborobo sy velona ny antoko Tiako i Madagasikara (TIM) ao amin'ny kaominina Ambohitrimanjaka, avy amin'ny antoko TIM rahateo koa ny ben'ny tanàna ao antoerana dia Dr Randriamanalintsoa Ihajasoanirina. Tsy mitsahatra ny manentana ny fototra ny COMTIM Ambohitrimanjaka, tonga amin'ilay fitenana hoe : « sioka tokana fotsiny dia tonga avokoa ny mpikatroka rehetra », amin'ny fotoana ilana azy.

Isambilo

Skoto eto Madagasikara

Maniry ho mpanara-maso amin'ny fotoam-pifidianana

Fotoam-pankalazana lehibe ho an'ny skoto maneran-tany ny andron'ny talata 22 february lasa teo iny, fotoam-pahatsiarovana ny nahaterahan' i Baden Powell mpanorina ny skoto, izay tsy nanadi-noan'ny firaisan'ny skotisma malagasy ny anjara-rany ihany koa. Maro ireo Raibe, Renibe, zokiolona efa nanao izany fahiny, ka nilaza am-pahatsorana fa be ny tombontsoa azo, eo amin'ny ara-batana, aratsaina, ara-panahy, sy ny

maro hafa eny amin'ny fiaraha-monina samihafa eny. Nilaza izy ireo, tily, antily, kiady, mpanazava tamin'ny taona 60, fa mitohy hatrany ny asa sy fiarahamiasa, mba maniry izy ireo fa amin'ny fotoam-pifidianana 2023, moa ve tsy tsara raha ireo skoto no atao mpanara-maso ny birao isanisany, miaramiasa amin'ny CENI? Ny fokontany iray hoy izy ireo dia misy tempoly, eglizy, fiangonana samihafa izay

ahitana sampana skoto hatrany, ka azo inoana fa afaka hiara-hiasa amin'ny olon'ny fokontany ihany koa sy ny biraom-pifidianana misy amin'izany fotoana. Ny Vavy antitra iray mpanazava fahiny aza moa dia nilaza nandroso hevitra manao hoe: maninona raha haverina manontolo ny fanisam-bahoaka mpifidy, dia ankinina amin'ireo skoto efa ho 40.000 mahery manerana ny firenena sy mitsinjara manerana ny fokontany

marobe ihany koa, izay azo antoka tsara eo amin'ny tontolo manodidina. Anisan'ny vaha-olana io nolazainy io, satria raha ety Ambatofotsy-Avaratra no misy anay ohatra hoy izy, dia ny skoto avy amin'ny Ecar, Fjkm, Flm ety an-toerana no afaka hanao ny fanisana amin'ny fomba marina, malaky, sy miandraikitra ny lalao rehetra toy ny ataon'ny mpitsara lalaom-panatanjantena.

Beharo

Kaominina Talatamaty

Tratra ny 70 ka hatramin'ny 80% ny tetikasa



Ny ben'ny tanànan'i Talatamaty Raharinoasy Elie Dominique.

Nisongadina nandritry ny tatitry ny asa vita tao anatin'ny taona 2021, fa tratra ny 70 ka hatramin'ny 80%-n'ireo tetik'asa nokasaina raha ny nambaran'ny ben'ny tanànan'i Talatamaty distrikan'Ambohidratrimo, Raharinoasy Elie Dominique, ben'ny tanàna voafidy tamin'ny antoko TIM, tamin'ny mpanao gazety. Isan'izany ny lalana vita pavé mirefy 1 km tao amin'ny fokontany Amborompotsy sy Faralaza. Teo ihany koa ny fametahana jiro mandeha amin'ny angôvo avy amin'ny masoandro maherin'ny 200 tamin'ireo fokontany 12 mandrafitra ny kaominina. Nahavita sekoly misa roa ihany koa ny kaominina tao amin'ny fokontany Ankadivory sy

Ambohinambo. Vita ihany koa ny fananganana ny Csb2 tao Talatamaty, ary tsy hadino ireo zokiolona sy sahirana rehefa fetin'ny fahaleovantena sy ny faran'ny taona. Ho tohizana ireo asa efa natomboka raha ny nambaran'ny antoko TIM, toy ny lalana, fametahana jiro, fahasalamana, izay iarahana amin'ny malala-tànana, ny rano fisotro madio, fanohizana ny sosialin'ny mponina, sns... ary tanjona ny fahavitana ny karaman'ny mpiasa sy ny fampitomboana ny fampidiran-ketra, na dia misedra olana aza ny kaominina amin'ny aretina covid-19 eto Madagasikara.

Rajo

Ny Valosoa sy fakafaka

Mitohy hatrany ny tsy fangaraharana Tsy hita izay nambaran-dRajoelina avy any Bruxelles

Mitohy hatrany ny fifamaliana eo amin'ny samy tomponandraikitra eto amin'ny firenena amin'izao fotoana izao. Mitohy hatrany ihany koa ny tranga tsy mazava amin'ny fitantanam-pirenena. Tsy maharaka intsony ny vahoaka izay natao rahateo ho tompontrano mihono mandrakariva, ka izay tiatian'ny mpi-tondra ambara aminy ihany, ao anaty kajikajy politikany, no ambarany. Nambara fa hisokatra amin'ny 04 Martsa izao ny habakabak'i Madagasikara. Dia hoy ny maro tsy maharaka, f'angaha tsy efa nisokatra foana hatrizay na dia tao anaty fihobohana raha? Ary taty aoriana dia niha-nidanadana izany, aza ny fahitan'izy ireo azy. Ka nidaon'ity ambara ho hisokatra amin'ny fomba ofisialy ity? Very ny maro ao anaty sangodim-panina politikan'ny fitondrana. Izany ve no fomba itantanana firenena? Nandrasan'ny mpanara-baovao, izay vokatry ny dian'ny filohan'ny Repoblika avy tany Bruxelles. No-voizina be ery tamin'ny haino aman-jery, indrindra ny an'ny fanjakana, ny fitaterana ny vaovao nandritry ny fivoriana natrehiny tany. Toy ny hahazo vola be ery i Madagasikara hoentiny avy any. Nangingina anefa ny fahatongavany, tsy re tsaika araka ny fomba fiteny. Dia samy nanontany tena ny rehetra mpanara-baovao: tsy nisy vokatra angaha, tsy nisy vola azo na fiaraha-miasa angaha? Matoa nangingina hoy ny sasany, dia tsy nisy vokatra mazava izay. Efa fantatra ihany ny fidehaky ny filohan'ny Repoblika rehefa misy vokatra azony izay avy any ive-lany. Tonga dia resabe eny lvato vao tonga, na any an-dapa. Efa fantatry ny maro ny fomba fanaony sy ny fiasan'ny fitondrana Rajoelina. Tsy tato anatin'ny telo taona ihany, fa efa nisy ny tamin'ny tetezamita. Tsy milaza zavatra amin'ny vahoaka raha tsy efa misy tiany hahatongavana. Hatreto, tsy mangaraha ny ataon'ny fitondrana amin'ny fomba fitantanana ny firenena. Mazava loatra fa ao anaty kajikajy politikany hatrany am-piandohana izany. Tsy mahaso ny firenena anefa izany, ary vao mainka manamafy ny tsy fifampitokisana sy ny elanelana manasaraka ny fitondrana sy ny vahoaka entiny.

Sôh'son

Raharaha fikasana hamono olona

Nidoboka eny am-ponja i Raissa



Ramatoa Raissa Razaivola.

Raharaha Raissa Razaivola : naiditra am-ponja vonjimaika afak'omaly alina eny Antanimora izy taorian'ny fiakarany fampanoavana. Niatrika fanadihadiana teny amin'ny fampanoavana Anosy ny alakamisy alina teo Ramatoa Raissa Razaivola, ka taorian'izay dia nampidirina am-ponja vonjimaika (MD) eny Antanimora. Tsy niaraka aminy ny zanany izay vao teraka 2 herinandro lasa izay. Tampoka ny fampiantsoana teny amin'ny fitsarana, hoy ireo mpisolovava azy ary tsy voahaja ihany koa ny fahafahana miresaka amin'ny mpisolovava. Raha ny tombatomban'ny mpisolovava hatrany dia mety ho ilay raharaha ambara fa fikasana hamono olona, no antony nampidirana an-dRamatoa Raissa Razaivola am-ponja vonjimaika izao. Tsy mbola misy daty mazava kosa mety hanatanterahana ny fitsarana azy. Nalaza koa ity Ramatoa ity tamin'ny raharaha kolikoly sy ny Ministra Imbiko Herilaza, mety misy hifandraisany amin'izao raharaha izao koa izany.

Stefa